

老稼齋集

八

~ 18
2452
3 上



2428
3止
2452
3止

老稼齋集卷之五目錄



詩

具連川曾構草堂于清潭谷口允齋嘗往遊題
七絕一首刻于石又書西山精舍四字及晦
翁雲谷五絕一首留之後失其書至其孫得
焉遂並清潭圖作帖求詩三首

正月初六日往定而叙別室有兩梅一謝一蓓
藟士敬雨以皆來會出韻同賦已而伯氏亦
至觴詠留連至暮而罷乙未

正月十八日士敬雨以見過心臺伯氏訪士敬

不遇見其梅而來用前韻同賦

正月廿夜期寤齋集反聽軒賞梅出韻同賦

再疊和寤齋

三疊屬伯氏

疊佳字

贈田成一次士敬韻 二首

李雲峰碩輔挽 二首

趙扶餘正緒挽

外從祖母遷葬挽 二首

與兒輩遊楮島舟中賦陰字 二首

宿奉恩寺翌日始登楮島

次趙綾州定而次佔畢齋韻

宗弟汝謙挽 盛益

送申正甫赴北幕 五首

綾州使君定而寄示盤字三律次之 三首

乙未十月五日楚楚軒彈琴

無睡

書示叔氏

待士敬

士敬至

共賦琴字

士敬又至共賦隨字

道以携琴歌至

謹次叔氏

疊前韻寄道以

次士敬遊棲雲寺韻

和叔氏清暉閣落成愴懷韻

次叔氏臨別韻

次士敬賀伯氏晬日韻

次金友顯甫韻

再疊屬翠麓

李公凍堂號二首

次士敬韻懷子以

族孫健行丙申

士敬兩以並轡來訪

二首

丙申閏三月初六日以舟往幸州士敬及彥信

兩兒童子履晉從履晉士敬孫也舟中次唐

人韻

次士敬韻

停舟陽川岸待潮退

鮮纜

舟中畫所過江山

金聖器京城樂師也性通絲竹無不妙解中歲

棄家自放江湖間以釣魚為事余是來物色
遇於陽川江中扁舟翦笠手一竿望之若物
外人其年六十八而貌亦不衰記昔丁巳上
元夜在鐘樓大街聽聖器笛後不復見今四
十年而遇於此亦奇矣士敬有詩遂次之

泊幸州次士敬韻

翌日與道以父子及彥信履晉同舟觀魚至鴨
島得葦魚為膾兩以純行李器之士安自城
中來士敬遂同諸人乘舟追至遇於中流

次士敬韻

夜信謙純行春行履晉士安諸人以小舟泛前
江余與道以彥謙在觀瀾亭使聖器吹簫次

諸人韻

歸舟次杜韻

杏洲曲 七首

和士敬

偶吟呈伯氏 三首

次放翁春陰韻

再疊和伯氏懷叔氏北行作

又疊前韻

又疊前韻和伯氏臨池作

同伯氏次王維輞川閑居韻

次伯氏韻

次伯氏用放翁幽居初夏韻

疊前韻

次伯氏韻

次伯氏晚眺韻

次伯氏韻

洪承旨禹瑞挽

申正甫挽十首

金判書達甫鎮圭挽

白巖堂小集次壁上韻

同叔氏定而士敬集太古亭

次士敬韻

和士敬長歌

金監司普澤挽二首

榆關郭舉人如栢以目送歸鴻小像詩遣示求

和遂次其韻戊戌

寄楊澄二首

次叔氏

酬楊澄二首

寄角山寺僧並序

士敬除夕律追改頸聯故輒依其韻更作一首

求教已亥

酬閔士澄洪次疊齋韻見寄之作已亥

伯氏奉審 園陵歸路歷臨

疊前韻酬閔士澄二首

又疊驚字寄閔士澄

伏奉燕行時 御製二絕不勝感泣謹用追賡

庚子

閔判書鎮厚挽二首

燕行墳篋錄

次伯氏辭家韻壬辰

次伯氏出城韻

歷視亡女墓次伯氏臨津韻

次叔氏松都臨別口占韻

迴瀾石謹次先韻

洞仙嶺謹次平山途中先韻

夕遊練光亭謹次先韻

練光亭

謹次安州先韻

嘉平途中謹次先韻 二首

曉星嶺謹次先韻

郭山途中謹次先韻

倚劍亭

和伯氏看劍舞

金將軍祠宇

次伯氏所串道中韻

龍濟謹次先韻

謹次龍濟感懷先韻

龍濟雜詠和息庵 五首

次伯氏謹次到龍濟寄叔氏先韻 二首

寄信兒

九連城謹次先韻

金石山朝飯

湯站途中

謹次湯站曉起先韻

孔巖途中

八渡河借騎胡騾騾主遼東人

謹次草河先韻

謹次會寧嶺先韻

會寧嶺

謹次遼東先韻

又次先韻

遼東舊城二首

太子河

瀋陽感懷

瀋陽謹次牛庄先韻

瀋陽感懷次零沙韻

謹次遼陽先韻

孤家子途中謹次先韻

次伯氏孤家子述懷韻二首

次伯氏歷大小黃旗堡及白旗堡次零沙韻三首

次伯氏黃旗堡途中韻

遼野

次伯氏自小黑山過羊腸河韻

宿新廣寧

次伯氏醫巫閭次零沙韻

次伯氏十三山又次先韻

次伯氏大凌河風雪韻

大凌河

小凌河

見獵胡

高橋堡早發向連山途中謹次先韻

訪祖大壽牌樓

寧遠衛謹次先韻

次伯氏東關驛韻

次伯氏中後所途中韻

自雨水河向中前所行四十里始明二首

到山海關關門扁曰天
下第一關

次伯氏山海關謹次先韻

山海關

次伯氏望海亭韻

榛子店次季文闌韻

和伯氏高麗堡作

次伯氏獨樂寺韻佛前有
絲花

和伯氏通州作

和伯氏東岳廟次零沙作

除夕

次伯氏除夕韻

次伯氏元朝志感韻 癸巳

元朝二首

訪三忠祠

次伯氏謹次暮景先韻

次伯氏謹次人日先韻

次伯氏立春日雜詠韻

次李元英韻 三首

感懷 三首

次伯氏偶吟韻

和伯氏無聊雜吟韻 二首

出正陽門觀天壇至安定門外而歸安定即外

城城門名去正陽六七里記沿道所見

登安定門次高適薊北韻

和伯氏七歌 七首

不寐

琉璃瓶小魚

次伯氏正月晦日書懷韻

次伯氏過五龍亭韻

薊州途中

玉田途中 用齊梁律

永平府途中

夷齊廟

永平途中

榆關途中

角山寺次碑上韻

高橋堡謹次塔山先韻

謹次廣寧先韻

甘露庵

過大凌河

次伯氏詠鴈韻

入遼東謹次冒雨入遼東先韻

龍泉寺次壁上韻書贈王僧精進寺在千山首二

向虎狼谷宿村家

次伯氏自連山發行途中韻

八渡河又用前韻

次伯氏寒食又吟

次伯氏出柵韻

鳳凰山

過沙菴川

記渡江三首

金將軍祠宇

次練光亭韻

練光亭

高陽途中

老稼齋集卷之五目錄

老稼齋集卷之五

詩

具連川曾構草堂于清潭谷口允齋嘗往遊題

七絕一首刻于石又書西山精舍四字及晦

翁雲谷五絕一首留之後失其書至其孫得

焉遂並清潭圖作帖求詩

清潭終古幽來往幾遊客獨有華陽翁留詩一片石

右次晦庵韻

曾瞻大老卅年前氣象巖巖萬仞懸常恨丹青模不

得雪中華岳却依然



右次尤翁韻

西山有佳處世人初未識清流與白石終古自噴薄
自從置草堂荒塗稍以闢先生賞其趣嘯詠來終夕
臨流落健筆潭龍相與攫我遊後升載悵然撫崖刻
人世閱滄桑巖泉換主客高風不可追後人起歎息
蒼然紙色古墨花烟霞積悲歌一仰止三峰立寥廓

右次士敬作

正月初六日往定而叙別室有兩梅一謝一蓓
藟士敬雨以皆來會出韻同賦已而伯氏亦
至觴詠留連至暮而罷乙未

東家歲酒有餘壺春興今朝不可孤坐處踈梅看欲
放來時飛雪與之俱故人狂態蓬生鬢太守風流竹
映符痛飲忘形非俗事醉來渾遣別愁無

正月十八日士敬雨以見過心臺伯氏訪士敬

不遇見其梅而來用前韻同賦

羸驂偶復入城門勝事相隨到敝軒家釀初開百花
好鄰梅頻報北枝繁衰情數日春寒在世故元宵月
色昏努力同人縱談笑浮生難遇是清樽

又疊壺字

閉門佳酒自盈壺太白揮來勸影孤墻外春梅猶在

否坐中詩友偶來俱青雲於我同遺屣白髮將年若
合符得句聊從後生問不知能似古人無

正月廿夜期寤齋集反聽軒賞梅出韻同賦

春鳥驚鄰興忽佳乍拚床薦到壘齋梅花徑就呼開
閣竹樹隨來笑上階信有三人心莫送還愁南國去
難偕鳳樓他日攀條處應惜馨香但滿懷壘齋士
敬號

再疊和寤齋

爲詩偶喜放翁佳可笑人呼作稼齋萬事遺情盃在
手三年謝病竹盈階西方華屋身還客南畝覃犁子
與偕草得一編幽薊記後來誰或識余懷

三疊屬伯氏

坐對西山日夕佳自吾先子有斯齋門前老樹槐當
逕庭畔餘叢菊在階把酒須思避賢遠推車借問與
誰偕從來直道妨今世莫信人懷似我懷

其二

西崦人佳梅亦佳幽期宿昔置高齋春城稀漏風傳
陌夜箔疎聲雪到階短燭猶明詩欲就深杯更勸譖
仍偕傍人莫恠頻追逐頭白猶存竹馬懷

贈田成一次士敬韻

千古王孫未返閭嗟君皓首意何如微官感激空看

劍壯士嗟跼不讀書下國悲蕭傳詠日故園梅樹盡
來初兒時尚記阿爺說洛水邯山是舊居

其二

久行羣雄起左間中原消息竟何如清河未入詞人
頌閨統須歸太史書燕市歌悲贈鞭際廣平淚落示
圖初忍看永樂龍興地輸與臊奴百歲居

李雲峰碩輔挽

矍鑠猶堪用蹉跎卧夾雲誰能闢鉞授竟止縣符分
老驥流沙夢龍泉古獄氛谷城春草綠永葬李將軍
趙扶餘正緒挽

到邑能幾日計來人共嗟琴流百濟水筆落一巖花
櫛逗新營隴魂歸更賃家夜臺逢我弟應復好詩誇

外從祖母遷葬挽

天錫夫人壽唯教閱百罹涕洟茵有處甘旨閣無支
松檟先丘隔螟蛉後事悲外孫來執紼泉路慰相思

其二

小子外家養升堂自幼時寒爐知夜永踈屋見烟遲
每喜猶康健終嗟薄報施明村總陳跡南望我心悲
與兒輩游楮島舟中賦陰字

相期及解纜一笑破春陰漠漠沿洲草輕輕掠水禽

名亭柔櫓近細雨綠尊深幸未聾齋至今行免苦吟

其二

輓輟東郊未浮舟泝漢陰桃花五臺水烟雨 一二陵
林岸樹兒時眼春衣此日心王孫好亭子乘興一登
臨

宿奉恩寺翌日始登楮島

春江寺門濶飯後喚輕舟島上生青麥村前下白鷗
岸花移棹見風纜傍沙收酌酒長年別中洲悵莫留

次趙綾州定而次佔畢齋韻

憑君休詫老梅盤笏外珠山萬竹寒長嘯深林堪獨

坐能詩傲吏定貪看樓因籟爽愁難倚邑為笋多恨
未寃莫遣官人輕剪伐枝間鳳食實團團

宗弟汝謙挽 盛益

子有凌霄氣惜哉何遽亡山丘換華屋血淚在裘裳
遺澤楓溪斬流風湖海長衰兄撫陳跡痛哭白雲傍

送申正甫赴北幕

旗脚高風獵獵吹鏡營評事北征時行行送盡南飛
鴈愁殺磨雲上嶺遲

其二

白山終古路鴻濛近入胡兒遍踏中可惜朝廷看此

小不知圖在暢春宮

其三

爾祖當年戰穩城至今蕃漢懼威名此行努力追先烈莫諉書生不識兵

其四

主門江上望穹廬須識吾兄不腐儒六鎮形便皆領略何曾但讀案頭書

其五

鄭生之畫一源詩自有金剛無此奇正甫今携好手去寧將勝事讓他爲

綾州使君定而寄示盤字三律次之

空齋獨有篆香盤懷抱無聊又薄寒病後舊琴尋譜按愁中時菊倚窓看榮枯荏苒其誰宰生死蒼茫且自寬南去故人稀信字鳳樓千里月團團

再疊

佳辰彊疾具杯盤蟋蟀高堂歲欲寒絲竹已從兒輩覺詩篇堪作後來看日將西昊丹楓麗鴈向南飛碧落寬把酒却思陶令宅東籬露滿菊花團

三疊

須拂書床整蠟盤稼齋修理及天寒園空柴栗隣人

得籬敗黃花過客看室有蟻蚋非我畏病無醫藥待
兄寃歸歟弊簣窓間在卧遲鴿原笑語團我一作誰

乙未十月五日楚楚軒彈琴

久病萬念休高齋獨理琴琴聲何泠泠上有松千尋
誰能聽此曲兄自山中臨兩兒亦靜默侍坐菊花陰
蒸芋共療飢何必尊酒斟今日不易得彈罷復長吟
形神一以開送目寒山岑

無睡

孟冬夜已長漫漫如一年老睡一何短每覺三更前
輾轉萬念起往事悉森然自謂夜向曙良久雞始鳴

霜風撼空院皎然窓月縈衆人皆酣寢獨我苦不寧
嘗聞老人言每說此苦情况我屬久疾床簾無人護
殘齡知無多此夜良難度起坐欲彈琴又恐鄰里驚
靜言付空床但使天自明

書示叔氏

蕭蕭老稼齋床茵粗自具兄來處其中半月爰笑語
諸子講朱書疊疊說不停我亦病少間捨枕時叅聽
奧義雖未解庶遂夕死情

待士敬

待人人不至獨坐彈鳴琴窓外月漸高竹影散庭心

心知夜已深絃聲潤以沈彈一作理

士敬至

夜深君始至霜露滿襟纓借問何以晚蒼云乘月明
雞黍未及進篇翰已縱橫吾琴奏何曲今日有緩聲

今日曲名

共賦琴字

難得兄留久堪忘弟疾深說詩仍及易對榻每橫琴
露菊垂寒圃風松韻華陰所悲常棣樹凋謝不堪吟
士敬又至共賦隨字

繞屋參差稼柴門在斷陂馬嘶佳客至飯撤暝燈隨

曠野星臨戶高齋菊傍帷看君再來意多是爲新詩
道以携琴歌至

子能不負約騎馬到寒扉絲竹來相引壺觴坐自揮
年豐爲黍易病久見人稀但與高歌耳焉知世是非

時聞宰臣有以家禮源流被罪

謹次叔氏

寒山隨處在杖屨去留輕信宿捐僧榻歸來聽澗聲
琴書風雪灑道路虎熊鳴感興多吟詠仍携數子行
疊前韻寄道以

青門賣瓜老瓜盡掩荆扉金石商聲發丹青老筆揮

寒禽啄窓久融雪滴簷稀更問西湖主漁舟定是非

次士敬遊棲雲寺韻

臨陽別業世稱稀萬事誰知淚濕衣華屋漫爲遊客
闕青山不見主人歸淮南桂樹淒霜雪緜嶺簫聲聞
翠微試向後庵金佛問世間興滅是何機

和叔氏清暉閣落成愴懷韻

苔蘚修巖字丹青煥水亭先君所寄托小子敢違寧
起廢人皆悅含懷我獨醒楓松必恭敬毋使斧斤經

次叔氏臨別韻

滿目寒雲起路歧罷琴悵悵掩門時高山漠漠多松

桂何處還尋聽雨期

次士敬賀伯氏晬日韻

每進茲辰酒常瞻去歲顏康寧世亦有愷悌古猶難
太史傳萬石詩人歌北山願張愚弟畫烟水五湖寒

次金友顯甫韻

悠悠忽忽與誰羣悵望寒空一片雲閉戶高歌對僕
妾堆床陳冊雜詩文風前老柳當門卧雪後微蹊向
井分十里市朝還往斷近來消息不曾聞

再疊屬翠麓

李公涼堂號

城市常親白鳥羣古松門巷蔚於雲官無自至高其

枕客有時來會以文朽木類山華岳取新圖在壁輞
州分青門老圃今垂死一曲我洋願遣聞

三疊

啾啾寒雀動成羣喬木蕭蕭日入雲馮賊時人疑孔
聖仇凶徒黨嫉朱文堪悲大義春秋晦安用殘編主
客分歸去古亭籠水上枕流高卧耳無聞

次士敬韻懷子以

高齋聽春雨獨卧掩柴荆廢沼菖蒲出空園布谷鳴
朝廷政多事吠畝自閑情忽憶江潭路萋萋闌草生
士敬雨以並轡來訪

松下停琴卧逢君筆硯開庭陰桐始合梁語鸞初來
春務親農器朝廷隔酒盃吾詩忘已久啼鳥漫相催

其二

啼禽繞院野花飛故吏門生次第歸已信人言成貝
錦徒來世變似雲衣芳時忽忽聊酬盞好雨霏霏共
掩扉新句古琴俱得意墳麓勝事不曾違

丙申閏三月初六日以舟往幸州士敬及彥信
兩兒童子履晉從履晉士敬孫也舟中次唐

人韻

麻湖春水直連空岸上樓臺盡畫中催放輕篷幸州

去杏花如雪柳颺風

次士敬韻

歷歷楊花渡人家盡柳林風潮祖江信空翠華山陰
柔櫓鷗相逐清尊浪共深携君却失計聒耳短長吟

停舟陽川岸待潮退

閨月桃花水輕舟有所之停橈訪簫客分酒與篙師
浦樹童童立風帆箇箇歌來潮未可逆繫纜待歸時

解纜

舟中畫所
過江山

解纜春潮滿蓬窓遣盡開長江吟裏過遠岫畫中來
釣艇吹簫在商帆打鼓回中流各得意我興自悠哉

金聖器京城樂師也性通絲竹無不妙解中歲

棄家自放江湖間以釣魚為事余是來物色

遇於陽川江中扁舟翦笠手一竿望之若物

外人其年六十八而貌亦不衰記昔丁巳元

夜在鐘樓大街聽聖器笛後不復見今四十

年而遇於此亦奇矣士敬有詩遂次之

相逢不能識翦笠覆霜鬚跡已魚蝦混形惟山澤灑

心靈妙絲竹身老愛江湖安得扁舟買烟波入爾徒

泊幸州次士敬韻

道以是日方與鄉人為煎花
會幸州後山松林皆百年物

亭前水道變
盡如白沙

扁舟同父子泛泛卽吾家自爲葦魚膾誰煎杜宇花
松陰四世樹江勢十年沙苑在中流望樓臺落日斜
翌日與道以父子及彥信履晉同舟觀魚至鴨
島得葦魚爲膾雨以純行李器之士安自城
中來士敬遂同諸人乘舟追至遇於中流

釣艇載朝飯沿洄鴨島來潮平漁戶泛檣立海門開
舉網江豚怒吹簫浦鳥猜追來有數子喜甚並撓回
次士敬韻

早潮相約去迎魚小艇搖搖不畏孤塵世杳然千里
遠江湖漫浪一家俱天晴蓮嶽常臨睫港濶風花不

及壺欲盡欲詩皆安耳瀟湘只合對虛無

夜信謙純行春行履晉士安諸人以小舟泛前
江余與道以彥謙在觀瀾亭使聖器吹簫次
諸人韻

洞簫幽怨在虛亭數子揚舲去犯星海國三更潮水
白江蕪十里暝烟青棹歌隱隱聞梧島樓火亭亭間
柳汀待至月傾方就寢又聞狂叫濁醪瓶

歸舟次杜韻

來乘退潮下去得好風歸花柳時差晚湖山興不違
蓬窓張綠綺桂棹掛春衣翠老今何在仙峰但夕輝

杏洲曲

乘舟欲何之春水方泔泔所謂杏洲人宛在鷗鷺羣

其二

樓高萬松間俯臨滄江流自言以駿馬換一葦魚舟

其三

僮僕慣操網乘潮上下頻春來得魚多時寄城中親

其四

開窓天未曉一江燦星河漁舟乘月去卧聞歌聲過

其五

高樓散琴書卧對桂陽山興來乘舟去杳然雲水間

其六

落日登西甬倚杖共徘徊潮上風自起高帆蔽江來

其七

歸舟已整棹日出潮頭放送者在石磯春波一何曠

和士敬

稼齋四年抱奇疾思向清江散愁鬱杏湖老姪屢相
邀自冬至春煩書札勝事不可更遲回却與兩兒乘
舟發和風晴景亦邂逅麻浦飛花亂如雪龔齋詩客
自隨來招呼不復他人挈僉枕壺榼載一艙蓬窓安
穩如吾房楊花渡下江面濶岸樓津村盡微茫拈筆

欲畫還復止注目遙山但揮觴海口潮來風又逆停
棹且傍陽川石西湖釣翁善吹簫三十年前識面目
中流相見各敬惋往事猶記踏橋夕自言賣家買一
舟釣魚懶復向城郭嗟汝身世亦不俗此日堪爲舟
中客乘潮鼓柁興若驚顧眄已到觀瀾亭輕纜容與
未便繫魚泳鷗泛皆似迎主人岸幘喜可知方與鄰
耆開酒瓶處我高堂床篔簹安筆硯琴瑟恣所歡明朝
携我向何處鴨島之外雲水寬江豚帶怒競投舟葦
魚動色初登盤歸來共坐長松下此閒可以吾琴彈
萬帆過盡月東出但見澄江涵遠巖三更小楫放容

易以葦歌笑輕波瀾江湖可樂我忘歸世事已矣君
休歎鷓鴣鷺鷥相譏嚇誰似冥鴻在雲間烟波萬頃
若可借我亦從君持釣竿

偶吟呈伯氏

空齋寡人事水木自清幽庭雀新雛下池荷小葉浮
病餘琴指澁春去酒尊留不合傳佳句時危恐見尤
再疊

小院如山寺松陰白日幽鷺斜蛛網避花落硯池浮
客與春光去兄因世故留深知閉門是懶拙庶無尤
三疊

各有琴尊趣棲遲一院幽是非林鳥關榮辱野雲浮
難得連床樂猶思異域留墳麓極跌宕躄豆豈愆尤

次放翁春陰韻

郊園微雨至綠樹轉陰陰一世羣鷺日高齋對坐心
古琴山水韻新句鶴鷄吟回首關山役悠悠我思深

再疊和伯氏懷叔氏北行作

吾兄驅匹馬直到土門陰遍踏關山路方酬孤矢心
風雲萬里色詩律百篇吟時憶東郊弟應憐卧病深

又疊前韻

四月園林潤池塘槐柳陰苔紋點石面荇帶引波心

潑潑羣魚樂嚶嚶百鳥吟久存茗雪計猶戀此幽深

又疊前韻和伯氏臨池作

清渠一道活高柳數株陰相映遂爲勝於焉每會心

禽魚濠濮想月露浩然吟城市無閑客誰知我興深

取孟襄陽散髮乘夕涼
語爲亭名故第六句云

同伯氏次王維輞川閑居韻

一巷皆垂柳由來不設門陂塘常畜水籬落儼成村

雨惜綿田濕晴看麥隴翻年年杖策懶不覺自蕪園

次伯氏韻

蒼苔門巷水縈沙亂笋穿階逕欲斜蓮沼戲魚初展

葉菜畦飛蝶已生花
吾詩自笑蛇添足
時事誰知鼠有牙
高卧小齋清晝永
樹鷺梁鸞不妨辯

次伯氏用放翁幽居初夏韻

稼齋身世似僧家
深掩柴扉暮景斜
得失只須看塞馬
公私不合問池蛙
園中宛轉相呼鳥
簾外繽紛總落花
滿院松陰無客到
清泉獨試兩前茶

穀兩前所採謂兩前

疊前韻

翳翳烟生屋啾啾雀聚門
黃牛草間路綠樹雨中村
出谷鷺暎滑歸巢鷺翅翻
誰尋子桑宅深卧網川園

次伯氏韻

四月園林鷺轉初紛紛
恠鳥亦相呼桃開李落誰能數
箎唱填酬自可娛
數卷書床留酒榼
一張琴匣伴香鑪
城中人說多新貴
翠蓋朱軒耀大途

次伯氏晚眺韻

去鳥歸雲莽蒼間
悄然相與倚荆關
江南遷客今何似
塞外遊人久未還
極目青蕪迷遠道
回頭紅日隱前山
園花不盡清樽在
欲喚鄰翁共解顏

次伯氏韻

霧裏生紅日
高窓向野開
耕牛早已去
啼鳥正相催

老穉齋集
砌笋抽無數庭花掃幾回
龔齋亦恠事殊不寄詩來

洪承旨禹瑞挽

運氣誠無奈公亡又此辰
誰方酌彼酒人欲百其身
稀濶儀庭鳳吁嗟絕筆麟
湘潭待再譴孰謂就幽窀

申正甫挽

惻惻申學士斯人埋九泉
那堪老眼裏玉樹常森然

其二

惻惻申學士了無富貴容
身是玉堂彥蕭然韋布同

其三

惻惻申學士文章展也成
足以傲一世猶然不自盈

其四

惻惻申學士清踈一文人
誰知腹裏大却自藏經綸

其五

惻惻申學士前秋出塞行
柔毫挾霜電悲慨滿氊城

其六

惻惻申學士雅志在漁簑
榮塗視浮雲牛渚渺烟波

其七

惻惻申學士正直貫心腸
一疏譁羣小千秋簡冊光

其八

惻惻申學士萬卷充華軒
猶恨讀書少琅琅臨絕言

其九

惻惻申學士丹旄上湖亭一宿向新阡江月萬古明

其十

惻惻申學士稼齋綠綺停平生山水曲已矣無人聽

金判書達甫鎮圭挽

道欲其方不必通一言流俗恥雷同知君化去為何物苦栢危松雪霰中

白岬堂小集次壁上韻

碧岬窓間見白雲天際橫園林無暑氣城市有遐情
緩帶嘉羞進凝毫好句成還驚昔日會忽復五年盈

同叔氏定而士敬集太古亭

太古亭中坐四人蕭然鬢髮遠炎塵晚來踈雨西峰
過半濕地邊老檜身

次士敬韻

遲遲畏景下西山散髮蒼藤老栢間竹守龔齋交白
戰晚涼金屬稼翁閑

和士敬長歌

君不見豆滿江水出白山東奔千里入海灣沿江亭
障若星羅吾兄匹馬遊其間歸來城市說壯觀却使
龔齋詩胸寬胸寬頓覺筆勢務為奮髯動輒書長句太

古亭中赤日午展紙落筆如風雨六鎮山川在眼前
八池春嶺何蒼然胡山四時雪未消使人詠此忘炎
天冰盤瓜李不復愛四座凜若陰風灑自耳傳詩詩
生想又欲因想移于畫畫成尺紙勢萬里高枕相對
吾老矣

金監司 普澤挽丁酉

信有謝庭樹其猶荀氏龍才猷名祖武詩禮大家風
喬木存休戚榮塗讓闕茸一言寧夕死 聖主感孤
衷

其二

淑世才難得斯人天不遺羣宵又側目二豎竟相欺
劔失盤根用松摧大厦支風流滿江漢千古峴山碑
榆關郭舉人如栢以目送歸鴻小像詩遣示求

和遂次其韻 戊戌

榆關山氣秀其士復如何易講義文熟詩凌鮑謝多
襟情寄高遠容髮任蹉跎試看傳神處飛鴻天際過
寄楊澄

短褐餘姚客棲棲燕市間虞翻懶就辟嚴子憶歸山
竹箭東南羨烟波歲月閑千巖與萬壑何處掩荆關
其二

萍水同浮跡風塵偶識顏贈衣慚季札弄斧遇輸般
禹穴蒼山古箕封碧海環婆娑二橙樹長入夢中攀

次叔氏

吾兄戀空谷歸去卧秋雲環堵琴書在鄰庵水火分
松風奏天籟溪石玩人文欲製衣裳寄池荷有晚薰

酬楊澄

夙抱烟霞疾死生又任天惟求免形累安敢慕神仙
灰冷丹竈敗霜添白髮鮮高人有秘授庶可駐餘年

其二

魚雁書時見我洋琴獨張同生老天地各抱熱心腸

伏櫪衰騏驥翻風鬱豫章燕都一邂逅六載耿難忘

寄角山寺僧

並序

癸巳二月余自燕京歸歷訪角山寺寺有讀
書少年見余欣然若舊識解榻斟茗以筆問
荅夜處余于寺之東廊間壁有一老僧凝坐
翌朝與少年別出囊中酒共飲僧遂來就坐
少年起而致敬仍告余曰此僧不可輕視亦
曾經五品之職余問何以托跡空門曰老而
無局時年蓋七十四云余於是意其有志君
子而行忙未及叩既歸三年寄少年書始問

其人姓名來歷少年具以報曰僧西河平遙人也姓楊名文成字名海初爲幕下馬軍性豪爽善騎射充精槍法副總趙良根奇之拔授千總曰是人魁梧奇偉自是異日良將從討賊屢戰有功遂遷懷遠將軍之職在任廉謹撫兵恤民有古人風未幾趙副總以不善承奉上官爲制臺所誣連坐屬員二十四人皆擬黨錮問罪會有特旨止擬降調同列諸人或赴職或待用而楊獨夷然不屑或勸之則曰五斗折腰彭澤不屑丈夫進退自有時

區區雞肋復安能繫余身爲遂入山削髮被緇謝絕塵緣者今且二十年年紀已邁而意氣愈豪壯悲歌慷慨不減燕趙遺風嘗語人曰人生世上其來也旅寓其去也旅歸客途勞攘枉自奔波耳遂自號弘寓山名寬緣蓋誌其以緣寓形也噫古人謂忠臣義士爲將及柄兵者不得志而徃徃逃於禪師豈其人也歟然余見師狀貌雄偉氣度沉毅可知其爲將不止一槍之勇而又嘗見知於趙副總職至將軍則不可謂不得志使究其用萬戶

老穉齋集
二二一
侯豈足道哉而一見不平遂自棄於緇髡之中何哉不可知也余聞燕薊間古多奇偉豪傑之士庶幾今亦有之而向日之遊未遇其人惜乎吾師又當面差過未能問其少日從軍之事與夫所以棄世入山之由而相與扼腕慷慨余甚恨之少年以余爲猶知師也乃告之曰倘憐斯人賜以題詠或亦顯微闡幽之一道也嗚呼以天下之大豈無知師者而少年之言如此乎可異又可悲也遂作一詩寄之顧此何足以輕重師也且師以浮雲視

身世不知今猶在角山而能見余詩否少年榆關人姓名程洪亦奇士也

角山寺中八十僧少日鐵槍人無敵玉關青海幾橫行戰功始授將軍職一見不平毀憤去懷遠告身視弊烏姚平直入大回山寒巖常乞國清食豪傑徃徃逃禪釋此僧行藏誰復識家在西河不思歸凝坐蒲團髮皓白窓間夜聞渤海濤忽疑鐵馬行沙磧起登長城放悲歌胸中慷慨何曾釋寒巖卽寒山子

士敬除夕律追改頸聯故輒依其韻更作一首
求教

六旬有二是吾年歲酒盈壺但兀然已識死生如晝
夜寧將窮達怨人天過庭佳子謀修屋上茨聞官約
共舡不可今春無二事行留只合且隨緣

酬閔士澄泓次聳齋韻見寄之作

白首居黃閣吾兄寵若驚羣情在姑息一疏警昇平
暗域方窺影羣庖互吹聲青山東郭路處處野花生

伯氏奉審 國陵歸路歷臨

三人相對各衰翁昔日青軒一半空樂事難求城闕
裏公程暫駐野堂中川魚入網論風味田稻連庭詵
歲功只惜藕花開已盡繞池惟有蓼花紅

疊前韻酬閔士澄

幽居長樹木我髮亦蒼然冷落非爭地優遊是闕天
有驢稀入郭無客可論田獨喜蘭溪叟詩來句句圓

其二

統屋停寒水稼翁坐嗒然年衰書東閣道拙食爲天
喬木障蓮岳清庭纍菊田方知野人事亦少十分圓
又疊驚字寄閔士澄

盡室皆飢卧先生了不驚松風一谷滿柳色萬家平
面自烟霞氣歌猶金石聲篋中書未獻空遣蠹魚生
伏奉燕行時 御製二絕不勝感泣謹用追賡

飲水行色向幽都前席同時醉御壺誰想九重珍劑
降布衣亦被 聖恩殊

其二

遠役燕都與伯偕山河風景恨無涯 宸情特軫行
人事追睹 奎章倍愴懷

閱判書

鎮厚挽

兩世難兄弟公名冠一時忠勤家法在清白國人知
南漢胥儲重秋曹訟案疑精神隨處見千載定追思

其二

人生何必壽貴在死其時朝野粗無事功名亦不卑

能成蓐蟻願獨免抱弓悲去矣公奚憾餘休又兩兒

燕行填篋錄

次伯氏辭家韻 壬辰

自幸懸弧計不違出門何用謾依依百年古匣防身
劍七尺衰軀短後衣壯士寧能守蓬戶兒時固願戍
金微從他舉世皆嘲笑萬里幽燕遍踏歸

次伯氏出城韻

久矣稼齋休問天聊隨使節往幽燕腐儒志大嗟生
晚俠窟歌悲識兆先萬里雪風初葭韜數巡杯酒斲
開筵青門常務終難忘分付田奴却悵然

老稼齋集

二十一

歷視亡女墓次伯氏臨津韻

迺途今至此思爾尚如生
雪裏看孤墓山邊駐去旌
重泉已三載萬里復孤征
揮涕隨徒儷傍人亦愴情

次叔氏松都臨別口占韻

吹角荒城曙色明
出看庭燎照危旌
燕雲領雪東西路
百閱驪歌不盡情

廻瀾石謹次先韻

百尺竒巖五色輝
清流轉作小沙磯
停車欲訪皇華蹟
水鳥驚人磔磔飛

洞仙嶺謹次平山途中先韻

日出問前路先驅
入谷深嶺高愁馬
越山轉聽笳吟
朔氣添衰鬢危塗
損壯心還思卧東
郭散髮不曾簪

夕遊練光亭謹次先韻

沿江萬雉聳紅亭
水面如天與檻平
襟帶卽今雄一道
繁華從古號西京
沙堤十里驛驢熟
官妓三船錦繡明
醉放笙歌歸別館
夜深銀燭下層城

練光亭

西州佳麗大同川
城上高樓咽管絃
夜深月上清流壁
直入珠簾照綺筵

謹次安州先韻

鎖鑰西州壯營門節度雄山川多朔氣民俗有邊風
妖妓羅高筵危樓半遠空胡塵幸久靜高枕賀諸公

嘉平途中謹次先韻

西征千里旆悠悠未及燕山已弊裘家在東郊那可
望曉星嶺上漫回頭

其二

自笑吾行計謬悠布衣脫却豹爲裘燕中壯士悲歌
地萬一相迎坐上頭

曉星嶺謹次先韻

昨日雪驚眼今朝風刮顏車登曉星峻旆拂朔雲寒

已遞清南馬初看塞上山前途今尚遠召僕戒征鞍

郭山途中謹次先韻

客路纔千里三冬已半過晨裝常戒僕暮館却疑家
妓老人情熟盤腥海味多旅愁無處寫沿道賦皇華

倚劔亭

壯士憑軒意氣雄宣州鐵劔利如風他時洗血知何
處看取烏龍水盡紅

和伯氏看劔舞

宣州妓樂作邊聲舞劔佳人結束輕曲罷華堂霜月
白卧聽門鼓打三更

金將軍祠宇

柳下勁弓不虛發
匈奴尚說左營軍
毅魂未返遺祠在
隴上悲歌不可聞

次伯氏所申道中韻

驅車如昨日吹角又今朝
忽報胡山出真知我里遙
僕夫愁欲哭商譯暗生驕
長嘯看吾劍相携可渡遼

龍灣謹次先韻

轟轟胡山鴨水西
登高一望使人迷
歸書不必煩相報
聞此家人定欲啼

謹次龍灣感懷先韻

茫茫往事與誰論
來訪殘碑只斷魂
北望深着猶未雪
茲行又過壽星村

龍灣雜詠和息庵

龍灣城上統軍亭
俯視胡山手可攬
鴨水滔滔東北來
九龍卧處色黯黯

其二

龍灣江北盡彼地
樹木叅天禽獸多
我人相戒不敢近
時有胡騎倏忽過

其三

龍灣書院在城中
俎豆吾祖與乙公
村從麗代流傳

遠碑在千秋仰止同

其四

龍濟 聖祖昔巡狩一水盈盈欲濟辰陪鑿內附非
難事未覺鰲城異衆人

其五

龍濟城池昔壯戍丙丁之事寧不愧安得砲手只一
千把截三江殺胡騎

次伯氏謹次到龍濟寄叔氏先韻

鴟鳩詎識大鵬情躍馬西來舉世驚猶恨吾兄未聯
轡壯遊休說冠平生

其二

天寒絕澗一烟生兄卧其間萬事輕時憶吾行應不
寐滿山松月五更明

寄信兒

匹馬輕裘意自閑過江明日宿胡山家人不必煩相
念何異東郊往又還

九連城謹次先韻

槍軍一隊後先行亂樹高低是廢城雪滿荒山披草
宿天寒飢馬傍人鳴虎豹交過朝看跡徒旅相招夜
有聲却幸大衾同卧起填箠免奏苦寒情

金石山朝飯

征人冒霜起朝飯亦荒山指直遺鞭易裘重上馬艱
人烟望似有甌脫曠皆閑道上逢三虜皆言伏虜還

湯站途中

古壘今猶記額垣或有無胡山寒自燒磧樹遠如枯
葦密纔通馬林空不見鳥未知棲宿處去去問郵夫

謹次湯站曉起先韻

荒原來芟草張幕復懸燈爲竈皆依崖求泉或斧冰
胡霜厚似雪塞月細生稜耿耿誰能睡披衣獨屢興
孔巖途中

早發沙川霜滿顏龍山紅旭上三竿郵人已報柵門
近野色烟光十里間

八渡河借騎胡騾騾主遼東人

騰上遼東雪色騾揚鞭去似鳥飛過胡兒並轡爭相
顧頗恠衰翁意氣多

謹次草河先韻

萬岬奔騰若海波鎮夷形勝鬱嵯峨誰知鐵壁爲烟
草盡遣胡兒解漢歌天下英雄終恨少我東皮幣尚
須多傷心 聖祖經過地今日無人識草河

謹次會寧嶺先韻

老翁齋集 卷之五 二十
大嶺參天起高高不見巔谷虛增角響樹密礙旌懸
雪和胡雲暮人從虎穴穿征車何處稅古鎮有寒烟

會寧嶺

萬木參天不辨名山邊小廟半頽傾胡雲朔雪模糊
裏銅角高低半日聲

謹次遼東先韻

鬱鬱羈懷始欲寬遼陽西望莽蒼間荒城獨有千年
塔大野渾無一點山皂帽高風知己遠仙歌今日恨
相關可憐安市差彊意不遣唐皇得志還

又次先韻

華表西邊大野浮乍看堪喜又堪愁漫漫周道真如
砥點點遙岑漸縮頭積氣混沌初未判巨量溟海竟
無流吾東小兒爭譏我歸日先須詫此遊

遼東舊城

晨發狼子山夕至遼東城茲城是雄鎮壯麗舊有名
崇墉不復存濠塹荆棘生借問何至此往者酷被兵
瘡痍猶未蘓閭井少遺氓新肆雖繁華荒墟尚縱橫
佛宇獨完全所至金碧明中國尚浮靡舊俗今不更
城外百尺塔高哉誰所營造此誠勞費未救家國傾
仰視久歎息感慨徒傷情去投城北村夜聞河水聲

燕丹死此地令我沾纓

其二

千年城郭盡丘墟白塔巍然百戰餘若使令威今日
見不知悲恨復何如

太子河

太子河邊寒日暮三韓客子駐征車千年感慨將何
及終恨荆卿劍術疎

瀋陽感懷

恨未蹈東海慨嘗詠下泉短衣隨使節匹馬入胡天
城郭悲歌裏旃裘冷眼邊應無再來日謾自記山川

瀋陽謹次牛庄先韻

征途又見月生西天外鄉山渺已低跋涉慣來身却
健侏僂到處聽全迷果逢街上思羣稚魚在盤中憶
舊溪遙想故園寒日夕家人應復歎雞栖

瀋陽感懷次雩沙韻

天道如今可復論尚看腥穢滿乾坤長城虛繞蒙恬
塞椎髻無非李廣孫北海看羊地卽是秦關生角恥
猶存嗚呼往事詢何處征袖空添拭血痕

謹次遼陽先韻

十里雄城帶濶濠八門飛閣入雲高金縉歲歲來填

怪難見陰山壯騎逃

孤家子途中謹次先韻

塞草茫茫翻夕輝
天長不見暮禽飛
故鄉已去二千里
誰念征人載渴飢

次伯氏孤家子述懷韻

隨人渡遼水
携劍向燕雲
俠窟悲無士
窮廬恥有君
百年猶左社
四海尚同文
何日夷風變
中原脫鹿裙

其二

幽薊黃塵外
朝鮮紅日邊
路長心已倦
目斷夢猶牽
大野天如蓋
孤家夜抵年
家人應念我
相與坐燈前

次伯氏歷大小黃旗堡及白旗堡次零沙韻

一夕天驕拔漢旗
烟臺警報入關遲
當時不殺袁經略
縱失全遼詎至斯

其二

兒時壯志擬牽旗
來踏燕山恨却遲
莫訝渡遼增感慨
古來征戰盡於斯

其三

過盡黃旗望白旗
茫茫大野日斜時
行人遙指青山出
天畔巫閭一抹窺

次伯氏黃旗堡途中韻

已入遼西界寒蕪尚際天野平遲落日店遠有孤烟
胡漢車相續金繒馬欲顛可憐秦塞月猶似古時懸

遼野

大哉遼東野浩浩復漫漫不圖宇宙間乃有如是觀
我行在其畔初亦見遙山及至入中央四顧天團團
五日不遑出孰能窮倪端日月出其裏森溟溟渤窅
烟樹時點綴車馬走茫茫風沙忽而起瀕洞迷四方
常聞天寒日蜃氣出空中樓臺祭可數五色何葱籠
物大誠可觀竒變乃無窮其人定竒偉氣量不褊窄
以此作事功安得不磊落區區生偏域自視寧不悲

始知大河伯望海驚且浴東瀛與此野天下有兩竒
却思中國人未必皆見斯我生亦何幸壯覲能無之

次伯氏自小黑山過羊腸河韻

自問吾行有底忙扶衰萬里犯風霜秦關漢月徒盈
矚羌笛燕歌謾斷腸

宿新廣寧

始識巫閭面纔違小黑山民居尚繁盛城壘盡荒殘
遍野知胡畜逢人羨漢冠廣寧寒夜永雄劔謾頻看
次伯氏醫巫閭次雩沙韻

茫茫鶴野四無山忽見巫閭廣漠間名列職方爲北

鎮雄盤遼右控秦關馳神每閱前人記歸路思偷半
日閑賀老舊棲猶在否高風緬邈恐難攀

次伯氏十三山又次先韻

身健猶加飯炕寒更穩眠驅馳敢居後歷覽每思前
大漠圓胡月荒城少漢烟墳麓且慰意安得廢詩篇

次伯氏大凌河風雪韻

一領羊裘萬里來勁風打面雪如埃去年東郭梅花
發深卧閑房戶不開

大凌河

百戰山河在窮陰天地昏凍雲埋古堞暮雪下平原

慘愴腥膻氣煩冤猿鶴魂高麗醜面目能過錦州門

小凌河

客子愁無寐凌河曙月明殊方身遠到戰地意難平
報曉征笳咽通宵虜馬行那堪松杏路處處見頽城

見獵胡

憑凌百騎帶雕弓射獸平原百草中合散疾徐皆有
法至今鳴鏑尚餘風

高橋堡早發向連山途中謹次先韻

出門霜雪皓盈衣歷歷烟臺月掛時初角起人眠苦
短踈燈在店曙猶遲征鞍句穩吟難罷勸馬聲長聽

却悲行念故園梅已發天涯誰寄隴頭枝

訪祖大壽牌樓

屹屹層樓雙入雲侈叨嗟爾祖將軍當年不耐片時
痛今日難誇四世勲李氏陵夷真可惜工倭雕鏤亦
徒勤凌河百戰還他勇一簣叨虧竟負君

寧遠衛謹次先韻

皇朝謬計撤重藩坐見風塵百里昏忍使吾民舉左
衽枉教胡馬救中原吳王部曲知誰在祖氏牌樓見
獨存悲憤填胸洩不得仰看城郭謾傷魂

次伯氏東關驛韻

客從東海向燕京鄉月隨人處處明卧筭關門明日
入戍樓南畔聽濤聲

次伯氏中後所途中韻

行記山川短管携有時遐睡極青齊峰高西北知關
近海映東南覺野低壯志百年頭滿雪浪遊千里馬
穿蹄吳王舊宅城中在來問居人半已迷

自兩水河向中前所行四十里始明

雞鳴兩水河月照前屯衛驅車旁濠去隱隱見睥睨
其二

明滅城下火知是蒙古宿投店天始曙凝霜滿面目

到山海關關門扁曰天

第一關開正向東地形人力兩誇雄山如萬夫從天
下城引危譙入海中肩鏑終歸大盜有杵錐閑費幾
年功腥塵盡日胡車塞默立濠橋憶魏公

次伯氏山海關謹次先韻

粉堞華譙草盡生尚看夷夏擅雄名枕來渤海為天
塹俯視陰山察虜情秦政可言無遠略李陵終惜墮
家聲潛身不敢悲歌放恐遣胡兒識此行

山海關

歷歷山河在悠悠男子征驅車李廣郡秣馬始皇城

帶劍終何用吟詩但不平未知燕市士能復記荆卿

次伯氏望海亭韻

雄城枕海嶄東偏上置層樓勢屹然雲映登萊知幾
里山低韎鞞見三邊腐儒始識乾坤大勝覽仍將感
慨連朱檻碧牕無守者敗碑惟認大明年

榛子店次季文蘭韻息庵赴燕時到此店見壁

書一絕日推髻空憐昔日粧征裙換盡越羅裳
爺娘生死知何處痛殺春風上瀋陽覽之悽然

遂步
其韻

江南女子洗紅粧遠向邊雲淚滿裳一落殊方何日
返定憐征鴈每隨陽

和伯氏高麗堡作

草屋柴籬烟火踈門前稻畝水平渠村名不必煩相問景色依然是我居

次伯氏獨樂寺韻

佛前有
綵花

寺在唐時創人從海外來千年金佛卧臘月綵花開覽古城池壯憑高世界恢前街多羨酒痛飲向燕臺

和伯氏通州作

通州三面帶長河天下舟車輻湊多錦纜亘堤停越舶朱樓夾路倚胡娥雕籠處處調鸚鵡金市鬼鬼繫橐駝獨有東人穿葛屨顧瞻周道歎頻過

次伯氏東岳廟次零沙作

禮秩尊爲五岳宗普天香火競趨東清高帝座珪璋特拱衛神官劔佩同爐氣洞門深瑞霧麾幢上界滿冷風脩廊複閣行難遍半日停車若夢中

除夕

燕館投來歲亦窮夜深孤坐燭花紅同來火伴相勞苦共說家鄉若夢中

次伯氏除夕韻

門外車聲隱隱然坐知行樂異方偏聯床玉館憐今夜秉燭青軒憶去年椒盤寂寂誰相頌歷馬蕭蕭揔

不眠半夜鴻臚來致宴謾教羣僕飮腥膻

次伯氏元朝志感韻癸巳

先君曾此役往迹尚森然豈意燕山館重逢癸巳年
天時謾回復行色自傷憐獨有填箎詠相將和舊篇

元朝

玄帝燒香曉出宮鐘聲先動午門中雲隨騎去晨光
黑塵逐旗迴旭日紅縱戒重瞳毋妄語寧忘北地樹
奇功可憐天下無豪傑萬國終然拜跪同

其二

羶車銀燭織通衢五鳳門前起曉烏畫鼓動天旗入

闕金鞍立仗象隨奴殊慚季札來觀樂謾憶荆卿奉
獻圖宮殿連雲增感慨擎天柱下獨踟躕

訪三忠祠

行至一古廟乃是三忠祠愀然起我感下馬爲踟躕
廟中綸巾神知是漢丞相右有袍笏人左有披甲將
兩人問爲誰含笑盡如生是則南宋臣信國與鄂王
三人同其志曠世相與鄰祠傍一老人爲余指而云
嗟神所遭世千秋猶裂肝廟貌却夷然仰望益敬歎
始知大英雄氣象皆安閑偉哉宇宙間乃有此等人
成敗與利鈍陋矣不足論胡塵塞天地三光久無色

香火遂寥寥古殿皆頽落庭中萬曆碑剝落無人讀
而我是遠客偶來涕橫落無物薦微誠撫劍空躑躅

次伯氏謹次暮景先韻

落日古時城愁雲滿眼生無人俠士窟何處望諸塋
霸業今難問悲歌空復情胡兒他自得道上鼓簫聲

次伯氏謹次人日先韻

家在東郊掩草扉玉河深鎖對斜暉羈懷悄悄鴉皆
度鄉信茫茫鴈未歸錯料英豪隱屠肆慢教兒女泣
閨闈應知鄰曲皆相待春動桑田戴勝飛

次伯氏立春日雜詠韻

我生孤露幾逢春瞻彼蒿芽歲歲新今日遠遊腸更
斷倚閭誰念未歸人

次李元英韻

霜園老果見方春落在樽前色漸新造次相投休望
報瓊瑤元不在他人

其一

玉河東畔去遊春邂逅詩朋結社新竊比波斯能識
寶莫言明月暗投人

其人言願
爲朋友云

其二

海外狂歌五十春交遊常恨白頭新誰知今日金臺

畔邂逅輸肝剖膽人

感懷

來見秦皇萬里城九原回首憶吾兄壯遊歷歷歸誰

語一曲羨湖舟自橫三洲亡兄送人赴燕詩曾有不見秦皇萬里城羨湖一曲漁舟

語小之

其二

吾弟平生慕荆軻青霞奇氣鬱難磨今來擊筑悲歌

地頭白愚兄憶爾多

其三屬末矢庵

萬里携來百句詩天涯展看倍依依遙知雪嶽千峰

夜板屋寒燈夢我時

次伯氏偶吟韻

頭白無端入異鄉玉河館裏送年光盆花黯黯看將

謝盤菜青青見漸長雨露松楸違萬里陂池竹樹憶

東岡歸期遠近憑誰問分付郵人且進觴

和伯氏無聊雜吟韻

鬱鬱燕京城深深會同館門前玉河橋一路東西貫

其二

海棠隨寒梅水仙並幽蘭羣芳萃一室棣萼映其間

出正陽門觀天壇至安定門外而歸安定即外

城城門名去正陽六七里記沿道所見

白馬雕弓聚如雲猿臂少年獨出羣不必從人勤問

姓渠家應是故將軍天壇外羣胡習騎射李如楨之曾孫廷基亦來其中一少年胡

人善射問其姓名於廷基則但言其姓為李而不言名

登安定門次高適薊北韻

春風滿千里登高意自哀山河四望豁宮闕九重開
渺渺風沙起紛紛車馬回徘徊日已暮悵望待誰來

和伯氏七歌

有客有客東郊老十年賣瓜青門道一朝短衣隨使
車舉世皆笑頭已皓賣牛已買一蒯緱携來却掛銀

鞍好嗚呼一歌兮歌始發長路湯湯暗風雪

其二

有妻有妻今已亡結髮恩愛何時忘白雲山中同辛
苦至今井臼留麥庄我今頭白有遠遊萬里誰復念
衣裳嗚呼二歌兮歌噓唏百歲之後歸其居

其三

有子有子凡三人長子已死委荆榛其餘二人亦皆
病十年喪憂傷心神東郊有田且戮力柱門相守甘
賤貧嗚呼三歌兮歌思深歸歟蒼苔滿洞陰

其四

有女有女在泉臺四年不見何時回荒榛無路積雪
深嗟汝至斯良可哀辛勤成屋處幾日兩兒婉孌俱
稚孩嗚呼四歌兮歌最苦來時淚濕長湍土

其五

有兄有兄隱百淵桂樹枝樛荒塗綿出山別我何所
贈袞袞悲歌五十篇松都秉燭至明發嗟我此別非
壯年嗚呼五歌兮歌激楚陟岡欲望雲雪阻

其六

有弟有弟號圓陰陋巷栖止古人心環堵蕭然床有
書一生抱病閉門深鴻鴈于飛鶴鴿急送我坡州踰

惠陰嗚呼六歌兮歌自悲我悔與汝生別離

其七

我辰何在二月二哀哀蓼莪伊蒿蔚此身無復遊方
戀萬里隨兄入異地天涯怵惕履雨露節序冉冉清
明至嗚呼七歌兮雙淚流渺渺平丘望松楸

不寐

燕人多不寐夜中動鼓樂轟轟過門前驚我遠來客
音節倏悲壯側耳疑羽聲心動不復睡喔喔遠雞鳴

琉璃瓶小魚

魚在小瓶裏江湖久已忘何事玉河客思歸漫斷腸

次伯氏正月晦日書懷韻

日夕歸心憶漢陽我廬東郭更蒼茫
淹留但賦旄丘葛卧起常看北海羊
甕釀未成知水惡河魴已飫想
芹長還家定落春風後會見薔薇滿架黃

次伯氏過五龍亭韻

玉泉流水掖垣通百頃清波禁籞中
彩閣浮空噓萬蜃畫橋跨港飲雙虹
亦知靈沼成民力終惜雕牆近
鬼刃豈意先皇遊幸地百年終屬老胡翁

薊州途中

萬里高麗客東歸柳可鞭
燕鴻已滿野薊樹自生烟

累却除詩卷狂應費酒錢
山川與店舍所過亦依然

玉田途中

用齊梁律

玉田烟樹遠沿路亦青山
鴈聲初到薊草色未過關
村喧糞車出堡迺戍旗閑
遙想春關柳應復待人還

永平府途中

春光遍原隰四牡緩歸程
柳色無終縣川暉孤竹城
人家盡男織田野有驢耕
所遇存咨度詩篇關物情

夷齊廟

再到夷齊廟古城春草生
江光繞墻碧松籟滿臺清
移日漁舟泛親人渚鳥鳴
誰爲後來者空壁漫題名

永平途中

幽燕不得意匹馬復歸來縱酒漁陽市題詩孤竹臺
山河眼孔大宇宙老懷開畢竟東郊外携鉏理草萊

榆關途中

榆關指百里隱隱見長城雨雪盧龍塞風雲古北平
荒山通驛路小店帶柴荆關阨今猶在令人想用兵

角山寺次碑上韻

騎驃百折到禪廬迥出人寰地勢孤繞塔雪峰連北
漠度窓雲帆自東吳偶看古碣驚前劫遠撫長城歎
壯圖俯視向來爭戰處茫茫落日滿春蕪

高橋堡謹次塔山先韻

東瞻故國小如萍惆悵歸人去不停曠野聞鴻行近
塞荒城秣馬起侵星戰場春草迷前後仙洞桃花問
杳冥回首薊門如有失盤山已入暮雲青

謹次廣寧先韻

未說全遼鎖鑰雄諸郎箇箇氣摩空沙漠威聲專聞
外轅門鞞略半閨中空傳墟落留遺址尚看街樓詫
偉切却恨當年縱黠虜至今氛祲浩無窮

甘露庵

名山不可負策馬赴烟霞洞釋初看客巖桃早結花

林中掃地淨簷際引泉斜兩譯能隨至皆言願棄家
過大凌河

客路仲春盡韶光沙塞聞河水今始泮關柳未堪攀
海鮮偏登市村羊遠上山計應遼水上胡月見重彎

次伯氏詠鴈韻

已涉萬里遠休嗟數日違聯翩渡鴨水殊道竟同歸
入遼東謹次冒雨入遼東先韻

遼陽休說尚繁華城郭傷心不可過荆棘舊墟餘佛
宇旗帘新肆半胡家丘原漠漠春蕪遍石塔亭亭夕
照多來訪高僧難問此夜闌相對落燈花

龍泉寺次壁上韻書贈主僧精進寺在千山

踏遍山東北來經路四千風沙涉苦海烟雨到諸天
晚飯供榆蕈新茶淪石泉何妨未通語默坐更憺然

其二

石扇落初地中藏界大千龍潛峰有水僧老洞爲天
壁色含春雨松聲挾夜泉明朝下蘿逕回望但蒼然
向虎狼谷宿村家

百里隨一轍逶迤長谷間村烟隔小隴春日下荒山
客向漁梁過人收牧馬還主胡沽酒待却似舊知顏
次伯氏自連山發行途中韻

未說三江近先欣兩嶺過孤村皆有廟小水亦名河
石路逢車少泥塗陷馬多柵門餘數站鄉信定如何

八渡河又用前韻

八站行將盡龍濟指日過歸心正似水朝飯每臨河
故國清明近殊方雨雪多身疲詩轉拙其奈壯遊何

次伯氏寒食又吟

分付朝餐傍水傳柵門將出意飄然橐無長物惟留
劍路有閑詩詎直錢千疊蒼山盡胡地數竿紅旭是
東天忽聞今日爲寒食惆悵吾行已半年

次伯氏出柵韻

流水趨東地歸人出柵時家書隔年見我域望山知
塞柳多難盡胡雲遠欲隨今行備苦樂一一記須宜

鳳凰山

亭亭鳳凰山秀色春更潤東南四五峰特立如逆筭
我行雖甚忙攬轡屢回眄晨光尚矇矓石角遞隱現
置此衡廬列未知孰後先惜哉在遐域古人多未見

過沙菴川

指點君知否來時宿此丘殘菊猶滿地舊竈尚臨流
汲處水皆盡燒痕荻已抽人情戀桑下那免一回頭
記渡江

黃隲始到九連城微雨忽收生月星一點雲間明滅
火郵人指是統軍亭

其二

東臨喜見大江橫數里仍穿蘆荻行知是後徒今始
到柳林無數馬鈴聲

其三

兩岸喧呼到二更中流咿軋艫搖聲獨立岸沙高處
望亂山千疊是來程

金將軍祠宇

壯士去不返遺民悲至今荒沙柳已老戰地水猶深

胡虜傳神勇天王悼腹心新從北庭返感情倍沾襟

次練光亭韻

江南江北暝烟多坐聽中流欸乃歌釣艇盡移亭下
泊綾羅十里起春波

練光亭

普通門外草青青浮碧樓前春水生誰道吾行歸未
晚杏花如雪滿江城

高陽途中

青春作伴意揚揚草碧花紅滿路光却憶去時風雪
裏二更炬火入高陽

老稼齋集卷之五

老稼齋集跋

余生長北山下從公兄弟遊讀書講學以春秋爲期清風閣洗心臺之間蓋多會焉間或設酒食彈琴賦詩以爲樂農巖三淵實爲詞林之巨匠而若其竒調逸格每推公爲不可及公少有才局明透物情該貫算數當世識公者皆稱以公輔大器不幸遭家不造與時相絕沒齒田農之間無所表見於世然其爲詩清道精核描景象切事情或縱酒山林傲睨一世有擊劔悲歌之志其素所蓄積於中者往往有不自掩者此豈世所稱詩人剽竊蹈

襲者比狀參以朱夫子古今三變說則公之詩豈
在姚合韓偓之後而泛覽陳陸特出於以詩爲戲
農巖嘗居石郊與余循荷沼儵梁之上誦公詩數
篇曰高華研精老益深造三淵之稱道公亦如此
余嘗竊識之不忘也今覽斯集二公所論得之矣
余又何言獨余老白首不死而平日相與之周旋
者旣久故能知公詩道所極然奚足以盡公所有
狀文亦理正辭順體裁不紊不規規於古作者繩
墨而間多造語微妙者惜乎其絕少也公之子彥
謙兄弟以公遺稿屬余刊定旣又請其跋至再三

不已蓋以余爲舊老而篤於公也辭不獲已槩舉
其平日所見聞如是云族侄時保謹跋

家方隆盛絕意公車議政公惜其才云及己巳議政
公遇禍侍羅夫人廬白雲甲戌更化授內侍教官不
應遂就松溪力農圃自晦晚隨伯氏夢窩公入燕記
詠名山川古蹟以寫幽鬱感慨歸十年終于家辛丑
十二月十二日也享年六十有四明年二月權厝長
湍江漣里新卜之原至乙巳移左數十步午向以孺
人李氏墓合窆公英明介直節謹詳恕文章自高潔
輒以敏悟理事見難兄弟間然未嘗自多深惡貌飾
徇名者孺人宗室益豐君諱涑之女 宣祖大王四
世孫也先公二年生十六歸三十八卒始葬楊州栗

北里農巖先生嘗有誌稱孝順之德生三男一女男
長祐謙先沒一子出行女李顯重次彥謙三女長任
命周二幼次信謙進士二男亮行一幼女適脩撰趙
文命一子載浩載淵側室子女各二卑謙餘幼嗚呼
公卒未幾三淵先生繼沒夢窩公罹極禍於是諸父
皆亡世無知公者不肖孤信謙泣血謹識

